

AREMT certifikati Zavodu za hitnu pomoć



Hitna pomoć postala 46. centar u svijetu sa ovim certifikatom

Promovisano osam instruktora edukatora

Zavodu za hitnu pomoć KS-a jučer je dodijeljen certifikat Australasian Registry of Emergency Medical Technicians AREMT iz Kvislanda. Njega je direktorici Seni Softić - Taljanović uručio instruktor AREMT-a Nikolai Andersen iz Danske. Promovisano je osam najboljih instruktora, uposlenika Zavoda, koji su dobili licencu za instruktore edukatore ove eminentne kuće. Dodjelom certifikata, ova ustanova postaje međunarodni referentni centar za edukaciju prehospitalne urgentne medicine.

- Ušli smo u društvo najboljih i postali 46. ovakav centar u svijetu. Certifikat vrijedi četiri godine i nadamo se da ćemo ga u tom periodu uspjeti potvrditi i zadržati, a osam naših najboljih instruktora moći će educirati kadrove koji rade u bolničkim urgentnim centrima. Puno truda smo uložili u ovaj projekat, a priznanje je došlo od svjetskih

stručnjaka koji najbolje obavljaju ovaj posao i zato smo svi ponosni, kazala je Softić - Taljanović i certifikat predala kantonalnom ministru zdravstva Zlatku Vukoviću, ističući da je Ministarstvo Zavodu pružilo veliku pomoć u realizaciji projekta.

Andersen je naglasio da će AREMT biti ponosan na svoje nove članove.

- Odabrali smo sarajevsku Hitnu pomoć, jer ima veliko iskustvo u ovom poslu i dobro obučeno osoblje, pa kako oni mogu učiti od nas tako možemo i mi od njih. Ustavili smo izuzetno dobru saradnju koju ćemo nastaviti uz stavljanje ove organizacije na svjetsku listu certificiranih partnera, kazao je Andersen.

Doktorici Aidi Garanović certifikat puno znači i bit će podsticaj za nastavak edukacije, ali i prilika da znanje kao prvi instruktori prenose drugima.

Z.T.